

四庫全書

史部

欽定四庫全書

金史卷四十九

元中書右丞相總裁托克托等修

志第三十

食貨四

鹽

酒

醋

茶

諸征商

金銀稅

鹽金制權貨之目有十四酒麴茶醋香礬丹錫鐵而鹽  
為稱首貞元初蔡松年為戶部尚書始復鈔引法設官  
置庫以造鈔引鈔合鹽司簿之符引會司縣批繳之數

七年一釐草之初遼金故地濱海多產鹽上京東北二路食肇州鹽率賓路食海鹽臨潢之北有大鹽濼烏庫哩寔壘部有鹽池皆足以食境內之民嘗征其稅及得中土鹽場倍之故設官立法加詳焉然而增減不一廢置無恒亦隨時抹弊而已益都濱州舊置兩鹽司大定十三年四月併為山東鹽司二十一年滄州及山東各務增羨冒禁鬻鹽朝論慮其久或隳法遂併為海鹽鹽使司十一月又併遼東等路諸鹽場為兩鹽司大定二

十五年更徇灤為西京鹽司是後惟置山東滄寶坻呂  
解北京西京七鹽司山東滄寶坻斤三百為袋袋二十  
有五為大套鈔引公據三者俱備然後聽鬻小套袋十  
或五或一每套鈔一引如袋之數寶坻零鹽較其斤數  
或六之三或六之一又為小鈔引給之以便其鬻解鹽  
斤二百有五十為一席席五為套鈔引則與陝西轉運  
司同鬻其輸粟於陝西軍營者許以公牒易鈔引西京  
等場鹽以石計大套之石五小套之石三北京大套之

石四小套之石一遼東大套之石十皆套一鈔石一引  
零鹽積十石亦一鈔而十引其行鹽之界各視其地宜  
山東滄州之場九行山東河北大名河南南京歸德諸  
府路及許亳陳蔡潁宿泗曹睢鉤單壽諸州莒之場十  
二濤洛場行莒州臨洪場行贛榆縣獨木場行海州司  
候司朐山東海縣板浦場行連水沐陽縣信陽場行密  
州之五場又與大鹽場通行沂邳徐宿泗滕六州西由  
場行萊州錄事司及招遠縣衡村場行即墨萊陽縣之

二場鈔引及半袋小鈔引聽本州縣鬻之寧海州五場  
皆鬻零鹽不用引目黃縣場行黃縣巨風場行登州司  
候司蓬萊縣福山場行福山縣是三場又通行旁縣棲  
霞寧海州場行司候司牟平縣文登場行文登縣寶坻  
鹽行中都路平州副使於馬城縣置局貯錢解鹽行河  
東南北路狹西東及南京河南府陝鄭唐鄧嵩汝諸州  
西京遼東鹽各行其地北京宗錦之末鹽行本路及臨  
潢府肇州泰州之境與接壤者亦預焉世宗大定三年

二月定軍私煮鹽及盜官鹽之法命明安穆昆巡捕三年十一月詔以銀牌給益都濱滄鹽使司十一年正月用西京鹽判宋俟言更定狗灤鹽場作六品使司以俟為使順聖縣令白仲通為副以是歲入錢為定額四月以烏庫哩寔壘民饑罷其鹽池稅十二年十月詔西北路招討司明安所轄貧民富人奴婢皆給食鹽宰臣言去鹽灤遠者所得不償道里之費遂命計口給直富家奴婢二十口止十三年二月併權永鹽為寶坻使司罷

平灤鹽錢滄州舊廢海阜鹽場三月州人李格請復置  
詔遣使相視有司謂是場興則損滄鹽之課且食鹽戶  
仍舊而鹽貨歲增必徒多積而不能售遂寢其議三月  
大鹽灤設鹽稅官復免烏庫哩寔壘部鹽池之稅二十  
一年八月叅知政事梁肅言寶坻及傍縣多關食可減  
鹽價增粟價而以粟易鹽上命宰臣議皆謂鹽非多食  
之物若減價易粟恐久而不售以至虧課今歲糧以七  
十餘萬石至通州比又以恩獻等六州粟百餘萬石繼



至足以振之不煩易也遂罷十二月罷平州椿配鹽課  
二十三年七月博興縣民李孜收日炙鹽大理寺具私  
鹽及刮鹹土二法以上宰臣謂非私鹽可比張仲愈獨  
曰私鹽罪重而犯者猶衆不可縱也上曰刮鹹非煎何  
以同私仲愈曰如此則渤海之人恣刮鹹而食將侵官  
課矣力言不已上乃以孜同刮鹹科罪後犯則同私鹽  
法論十一月張邦基言實抵鹽課若每石收正課百五  
十斤應有風乾折耗遂令石加耗鹽二十二斤半仍先

一歲貸支債直以優竈戶二十四年七月上在上京謂丞相烏庫哩元忠等曰會寧尹富察通言其地明安穆昆戶甚艱舊率賓以東食海鹽扶餘呼爾哈等路食肇州鹽初定額萬貫今增至二萬七千若罷鹽引添竈戶庶可易得元忠對曰已嘗遣使咸平府以東規畫矣上曰不須待此宜亟為之通又言可罷上京酒務聽民自造以輸稅上曰先灤州諸地亦嘗令民煮鹽後以不便罷之今豈可令民自沽耶二十五年十月上還自上京

謂宰臣曰朕聞遼東凡人家食鹽但無引目者即以私治罪夫細民徐買食之何由有引目可止令散辦或詢諸民從其所欲因為之罷北京遼東鹽使司二十八年尚書省論鹽事上曰鹽使司雖辦官課然素擾民鹽官每出巡而巡捕人往往私懷官鹽所至求賄及酒食稍不如意則以所懷誣以為私鹽鹽司苟圖羨增雖知其誣亦必加刑宜令別設巡捕官勿與鹽司關涉庶革其弊五月敕巡捕使山東滄寶坻各二員解西京各一員

山東則置於濰州招遠縣滄置於深州及寧津縣寶坻  
置於易州及永濟縣解置於澄城縣西京置於多塔古  
秩從六品直隸省部各給銀牌取鹽使司弓手充巡捕  
人且禁不得於人家搜索若食鹽一斗以下不得究治  
惟盜販私煮則捕之在三百里內者屬轉運司外者卽  
隨路府提點所治罪盜課鹽者亦如之章宗大定二十  
九年十月上朝隆慶宮諭有司曰比因獵知百姓多有  
鹽禁獲罪者民何以堪朕欲令依平滌太原均辦例令

民自煎其令百官議之十二月戶部尚書鄧儼等謂若令民計口定課民既輸乾辦錢又必別市而食是重費民財而徒增煎販者之利也且今之鹽價蓋昔日錢幣易得之時所定今日與向不同況太平日久戶口蕃息食鹽歲課宜有羨增而反無之何哉緣官估高貧民利私鹽之賤致虧官課爾近已減寶坻山東滄鹽價斤為三十八文乞更減去八文歲不過減一百二十餘萬貫官價既賤所售必多自有羨餘亦不全失所減之數况

今府庫金銀約折錢萬萬貫有奇。設使鹽課不足亦足補百有餘年之經用。若量入為出必無不足之患。乞令平灤乾辦鹽課亦宜減價。各路巡鹽弓手不得自專。巡捕庶革誣罔之弊。禮部尚書李晏對曰。所謂乾辦者既非美名。又非良法。必欲杜絕私煮盜販之弊。莫若每斤減為二十五文。使公私價同。則私將自己。又巡鹽兵吏往往扶私鹽以誣人。可令與所屬司縣期會。方許巡捕。違者按察司罪之。刑部尚書郭邦傑等則謂平灤瀕海。

及太原鹵地可依舊乾辦餘同儼議御史中丞伊喇仲方則謂私煎盜販之徒皆知禁而犯之者也可選能吏充巡捕使而不得入人家搜索同知大興府事王脩請每斤減為二十文罷巡鹽官左諫議大夫圖克坦鎰則以乾辦為便宰臣奏以每斤官本十文若減作二十五文似為得中巡鹽弓手可減三分之一鹽官出巡須約所屬同往不同獲者不坐可自來歲五月一日行之上遂命寶坻山東滄鹽每斤減為三十文已發鈔引未支

者準新價足之餘從所請十二月遂罷西京解鹽巡捕使時既詔罷乾辦鹽錢以大理司直伊喇玖勝努廣寧推官宋宸議北京遼東兩路鹽司利病遂復置北京遼東鹽使司北京路歲以十萬餘貫為額遼東路以十三萬為額罷西京及解州巡捕使明昌元年七月上封事者言河東北路乾辦鹽錢歲十萬貫太重以故民多逃徙乞緩其徵督上命俟農隙遣使察之十二月定禁司縣擅科鹽制二月五月省臣以山東鹽課不足蓋由鹽



司官出巡不敢擅捕必約所屬同往人不畏故也遂詔自  
今如有盜販者聽鹽司官輒捕民私煮及藏匿則約所  
屬搜索巡尉弓兵非與鹽司相約則概不許擅入人家  
三年六月孫即康等同鹽司官議軍民犯私鹽三百里  
內者鹽司按罪遠者付提點所皆徵捕獲之賞於販造  
者明安穆昆部人煎販及盜者所管官論贖三犯杖之  
能捕獲則免罪又濱州渤海縣永和鎮去州遠恐藏盜  
及私鹽可改為永豐鎮與曹子山村各設巡檢山東

寶坻滄鹽司判官乞陞為從七品用進士上命明安穆  
昆杖者再議餘皆從之尚書省奏山東濱益九場之鹽  
行於山東等六路濤洛等五場止行於沂邳徐宿滕泗  
六州已有定課方之九場大課不同若令與九場通比  
增虧其五場官恃彼大課恐不用力轉生姦弊遂定令  
五場自為通比舊法與鹽司使副通比故至是始改焉  
五年正月八小場鹽官左華等以課不能及額繳進告  
勅遂遣使按視十三場再定除濤洛等五場係設管勾

可即日恢辦乃以革所告八場從大定二十六年制自見管課依新例永相比磨戶部郎中李敬義等言八小場今新定課有減其半者如使俱從新課而舊課已辦入官恐所減錢多因而作弊而所收錢數不復盡寔附歷納官遂從明昌元年所定酒稅院務制令即日收辦十一月以舊制明安穆昆犯私鹽酒麴者轉運司按罪遂更定軍民犯私鹽者皆令屬鹽司私酒麴則屬轉運司三百里外者則付提點所若逮問犯人而所屬恡不

遣者徒二年十一月尚書省議山東滄州舊法每一斤  
錢四十一文寶坻每一斤四十三文自大定二十九年  
赦恩併特旨減為三十文計減百八十五萬四千餘貫  
後以國用不充遂奏定每一斤復加三文為三十三文  
至承安三年十二月尚書省奏鹽利至大今天下戶口  
蕃息食者倍於前軍儲支引者不甚多况日用不可闕  
之物豈以價之低昂而有多寡也若不隨時取利恐徒  
失之遂復定山東寶坻滄州三鹽司價每一斤加為四

十二文解州舊法每席五貫文增為六貫四百文遼東  
北京舊法每石九百文增為一貫五百文西京煎鹽舊  
石二貫文增為二貫八百文撈鹽舊一貫五百文增為  
二貫文既增其價復加其所鬻之數七鹽司舊課歲入  
六百二十二萬六千六百三十六貫五百六十六文至  
是增為一千七十七萬四千五百一十二貫一百三十  
七文二分山東舊課歲入二百五十四萬七千三百三  
十六貫增為四百三十三萬四千一百八十四貫四百

文滄州舊課歲入百五十三萬一千二百貫增為二百七十六萬六千六百三十六貫寶坻舊入八十八萬七千五百五十八貫六百文增為一百三十四萬八千八百三十九貫解州舊入八十一萬四千六百五十七貫五百文增為一百三十二萬一千五百二十貫二百五十六文遼東舊入十三萬一千五百七十二貫八百七十六文增為三十七萬六千九百七十貫二百五十六文北京舊入二十一萬三千八百九十二貫五百文增為

三十四萬六千一百五十一貫六百一十七文二分西  
京舊入十萬四百一十九貫六百九十六文增為二十  
八萬二百六十四貫六百八十八文四月宰臣奏在法明安  
穆昆有告私鹽而不捕者杖之其部人有犯而失察者  
以數多寡論罪今乃有身犯之者與犯私酒麴殺牛者  
皆世襲權貴之家不可不禁遂定制徒年杖數不以贖  
論不及徒者杖五十八月命山東寶坻滄州三鹽司每  
春秋遣使督按察司及州縣巡察私鹽泰和元年九月

省臣以滄濱兩司鹽袋歲買席百二十萬皆取於民清  
州北靖海縣新置滄鹽場本故獵地沮洳多蘆宜弛其  
禁令民時採而織之十一月陝西路轉運使高汝礪言  
舊制捕告私鹽酒麴者計斤給賞錢皆徵於犯人然監  
官獲之則充正課巡捕官則不賞巡捕軍則減常人之  
半免役弓手又半之是罪同而賞異也乞以司縣巡捕  
官不賞之數及巡捕弓所減者皆徵以入官則其罪賞  
均矣詔從之三年二月以解鹽司使治本州以副治安



邑十一月定進士授鹽使司官以榜次及入仕先後擬  
注四年六月以七鹽使司課額七年一定為制每斤增  
為四十四文時桓州刺史張煒乞以鹽易米詔省臣議  
之六月詔以山東滄州鹽司自增新課之後所增歲積  
蓋官既不為經畫而管勾監同與合千人互為姦弊以  
致然也即選才幹者代兩司使副以進士及部令史譯  
人書史譯史律科經童諸局分出身之廉慎者為管勾  
而罷其舊官十月西北路有犯花鹹禁者欲同鹽禁罪

宰臣謂若比私鹽則有不同詔定制收鹹者杖八十  
斤加一等罪止徒一年賞同私鑿例五年六月以山東  
滄州兩鹽司侵課遣戶部員外郎石鉉按視之還言令  
兩司分辦為便詔以周昂分河北東西路大名府恩州  
南京睢陳蔡許潁州潁滄鹽司以山東東西路開濮州  
歸德府曹單毫壽泗州潁山東鹽司各計口承課十月  
簽河北東西大名路按察司事張德輝言海墻人易得  
私鹽故犯法者衆可量戶口均配之尚書省命山東按

察司議其利便言萊密等州比年不登計口賣鹽所歛雖微人以為重恐致流亡且私煮者皆無籍之人豈以配賣而不為哉遂定制命與滄鹽司皆馳驛巡察境內六年二月右丞相內族宗浩叅知政事賈鉉言國家經費惟賴鹽課今山東虧五十餘萬貫蓋以私煮盜販者成黨鹽司既不能捕統軍司按察司亦不為禁若止論販私鹽者之數罰俸降職彼將抑而不申愈難制矣宜立制以各官在職時所增虧之寔令鹽司以達省部以

為陞降遂詔諸統軍招討司京府州軍官所部有犯者  
兩次則奪半月俸一歲五次則奏裁巡捕官但犯則的  
決令按察司御史察之四月從涿州刺史爪爾佳博諾  
言以萊州所納鹽錢聽輸絲綿銀鈔七年九月定西北  
京遼東鹽使判官及諸場管勾增虧升降格凡文資官  
吏員諸局署承應人應驗資歷注者增不及分者陞本  
等首一分減一資二分減兩資遷一官四分減兩資遷  
兩官虧則視此為降如任回驗官注擬者增不及分陞

本等首一分減一資二分減兩資遷一階四分減兩資  
遷兩階虧者亦視此為降十二月尚書省以盧附翼所  
言遂定制竈戶盜賣課鹽法若應納鹽課外有餘則盡  
以中官若留者減盜一等若刮鰯土煎食之採黃蘗草  
燒灰淋鹵及以酵粥為酒者杖八十八年七月宋克俊  
言鹽管勾自改注進士諸科人而監官有失超陞縣令  
之階以故怠而虧課乞依舊為便有司以泰和四年改  
注時選當時到部人截替遂擬以秋季到部人注代八

年七月詔汧淮諸榷場聽官民以鹽市易宣宗貞祐二年十月戶部尚書言陽武延津原武滎澤諸縣饒鹹鹵民私煎不能禁遂詔置場設判官管勾各一員隸戶部既而御史臺奏諸縣皆為有力者奪之而商販不行遂勅御史分行申明禁約三年十二月河東南路榷宣撫副使烏庫哩慶壽言絳解民多業販鹽由大陽關以易陝虢之粟及還渡河而官邀糴其八其旅費之外所存幾何而河南行部復自運以易粟于陝以盡奪民利比

歲河東旱蝗加以邀糴物價踴貴人民流亡誠可憫也  
乞罷邀糴以舒其患四年七月慶壽又言河中乏糧既  
不能濟而又邀糴以奪之夫鹽乃官物有司陸運至河  
復以舟達京兆鳳翔以與商人貿易艱得而甚勞而陝  
西行部每石復邀糴二斗是官物而自糴也夫轉鹽易  
物本濟河中而陝西復強取之非奪而何乞彼此壹聽  
民便則公私皆濟上從之興定二年六月以延安行六  
部員外郎盧進建言綏德之嗣武城義合克戎寨近河

地多產鹽請設鹽場官勾一員歲獲十三萬餘斤可輸錢二萬貫以佐軍三年詔用其言設官鬻鹽給邊用四年李復亨言以河中西岸解鹽舊所易粟麥萬七千石充關東之用尋命解鹽不得通陝西以北方有警河禁方急也元光二年內族額爾克言民運解鹽有助軍食詔修石牆以固之

酒金榷酤因遼宋舊制天會三年始命榷官以周歲為滿世宗大定三年詔宗室私釀者從轉運司鞠治三年



省奏中都酒戶多逃以故課額愈虧上曰此官不嚴禁私釀所致也命設軍百人隸兵馬司同酒使副合千人巡察雖權要家亦許搜索奴婢犯禁杖其主百且令大興少尹招復酒戶八年更定酒使司課及五萬貫以上鹽場不及五萬貫者依舊例通注文武官餘竝右職有才能累差不虧者為之九年大興縣官以廣陽鎮務虧課而懼奪其俸乃以酒散部民使輸其稅大理寺以財非入已請以贖論上曰雖非私贓而貧民亦被其害若

止從贖何以懲後特命解職二十六年省奏鹽鐵酒麴  
自定課後增各有差上曰朕項在上京酒味不嘉朕欲  
如中都麴院取課底使民得美酒朕日膳亦減省嘗有  
一公主至而無餘膳可與朕欲日用五十羊何難哉慮  
費用皆出於民不忍為也監臨官惟知利己不知利何  
從來若恢辦增羨者酬遷虧者懲殿仍更定併增併虧  
之課無失元額如橫班祇虧者與餘差一例降罰庶有  
激勸且如功酬合辦二萬貫而止得萬七八千難迭兩

酬者必止納萬貫而輒以餘錢入已今後可令見差使  
內不送酬餘錢與後差使內所增錢通算為酬則庶可  
入官及監官食直若不先與何以責廉今後及格限而  
至者卽用此法又奏罷杓欄人二十七年議以天下院  
務依中都例改收麴課而聽民酤戶部遣官詢問遼東  
來遠軍南京路新息虞城西京路西京酒使司白登縣  
德呼勒部族天城縣七處除稅課外願自承課賣酒上  
曰自昔監官多私官錢若令百姓承辦庶革此弊試行

之明昌元年正月更定新課令即日收辦中都麴使司  
大定間歲獲錢三十六萬一千五百貫承安元年歲獲  
四十萬五千一百三十三貫西京酒使司大定間歲獲  
錢五萬三千四百六十七貫五百八十八文承安元年  
歲獲錢十萬七千八百九十三貫七月定中都麴使司  
以大定二十一年至明昌六年為界通比均取一年之  
數為額五年四月省奏舊隨處酒稅務所設杓欄人以  
射糧軍歷過隨朝差役者充大定二十六年罷去其隨

朝應役軍人各給添支錢粟酬其勞今擬將元收杓欄錢以代添支令各院務驗所收之數百分中取三隨課代輸更不入比歲約得錢三十餘萬以佐國用泰和四年九月省奏在都麴使司自定課以來八年併增宜依舊法以八年通該課程均其一年之數仍取新增諸物一分稅錢併入通為課額以後之課每五年一定其制又令隨時酒務元額上通取三分作糟酵錢六年制院務賣酒數各有差若數外賣及將帶過數者罪之宣宗

貞祐三年十二月御史田迴秀言大定中酒稅歲及十萬貫者始設使司其後二萬貫亦設今河南使司亦五十餘負虛費月廩宜依大定之制元光元年復設麴使司

醋稅自大定初以國用不足設官榷之以助經用至二十三年以府庫充牣遂罷之章宗明昌五年以有司所入不充所出言事者請榷醋息遂令設官榷之其課額並當差官定之後罷承安三年三月省臣以國用浩大

遂復榷之五百貫以上設都監千貫以上設同監一員  
茶自宋人歲供之外皆貿易於宋界之榷場世宗大定  
十六年以多私販乃更定香茶罪賞格章宗永安三年  
八月以為費國用而資敵遂命設官製之以尚書省令  
史承德郎劉成往河南視官造者以不親嘗其味但採  
民言謂為溫桑寔非茶也還即白上上以為不幹杖七  
十罷之四年三月於淄密寧海蔡州各置一坊造新茶  
依南方例每斤為袋直六百文以商旅卒未販運命山

東河北四路轉運司以各路戶口均其袋數付各司縣  
鬻之買引者納錢及折物各從其便五月以山東人戶  
造買私茶侵牟權貨遂定比煎私鑿例罪徒二年泰和  
四年上謂宰臣曰朕嘗新茶味雖不嘉亦豈不可食也  
比今近侍察之乃知山東河北四路悉椿配於人既曰  
強民宜抵以罪此舉未知運司與縣官孰為之所屬按  
察司亦當坐罪也其聞寔以聞自今其令每袋減價三  
百文至來年四月不售雖腐敗無傷也五年春罷造茶



之坊三月上諭省臣曰今雖不造茶其勿伐其樹其地則恣民耕樵六年河南茶樹槁者命補植之十一月尚書省奏茶飲食之餘非必用之物比歲上下競啜農民尤甚市井茶肆相屬商旅多以絲絹易茶歲費不下百萬是以有用之物而易無用之物也若不禁恐耗財彌甚遂命七品以上官其家方許食茶仍不得賣及饋獻不應留者以斤兩立罪賞七年更定食茶制八年七月言事者以茶乃宋土草芽而易中國絲綿錦絹有益之

物不可也國家之鹽貨出於鹵水歲取不竭可令易茶  
省臣以為所易不廣遂奏兼令以雜物博易宣宗元光  
二年三月省臣以國歲財竭奏曰金幣錢穀世不可一  
日缺者也茶本出於宋地非飲食之急而自昔商賈以  
金帛易之是徒耗也泰和間嘗禁止之後以宋人求和  
乃罷兵興以來復舉行之然犯者不少衰而邊民又窺  
利越境私易恐因泄軍情或盜賊入境今河南陝西凡  
五十餘郡郡日食茶率二十袋袋直銀二兩是一歲之

中妄費民銀三十餘萬也奈何以吾有用之貨而資敵乎乃制親王公主及見任五品以上官素蓄者存之禁不得賣饋餘人竝禁之犯者徒五年告者賞實泉一萬貫

諸征商海陵貞元元年五月以都城隙地賜隨朝大小職官及護駕軍七月各徵錢有差大定二年制院務勦虧及功酬格八月罷詔路關稅止令譏察三年尚書省奏山東西路轉運司言坊蕩河渡多逋欠詔如監臨制

以年歲遠近為差蠲減又以尚書工部令史劉行義言  
定城郭出賃房稅之制五年以前此河漂罷設官復召  
民射買兩界之後仍舊設官二十年正月定商稅法金  
銀百分取一諸物百分取三章宗大定二十九年戶部  
言天下河泊已許與民同利其七處設官可罷之委所  
屬禁豪強毋得擅其利明昌元年正月勅尚書省定院  
務課商稅額諸路使司院務千六百一十六處比舊減  
九十四萬一千餘貫遂罷坊場免賃房稅十月尚書省

奏今天下使司院務既減課額而監官增虧既有陞遷  
追殿之制宜罷提點所給賞罰俸之制但委提刑司察  
提點官侵犯場務者則論如制詔從之二年詔減南京  
出賃官房及地基錢三年論提刑司禁勢力家不得固  
山澤之利又司竹監歲採入破竹五十萬竿春秋兩次  
輸都水監備河防餘遶刀笋皮等賣錢三千貫葦錢二  
千貫為額明昌五年陳言者乞復舊置坊場上不許惟  
許增置院務詔尚書省叅酌定制遂擬遼東北京依舊

許人分辦中都等十一路差官按視量添設院務于二十三處自今歲九月一日立界制可大定間中都稅使司歲獲十六萬四千四百四十餘貫承安元年歲獲二十一萬四千五百七十九貫泰和六年五月制院務課虧令運司差官監權

金銀之稅大定三年制金銀坑冶許民開採二十分取一為稅泰和四年言事者以金銀百分中取一諸物取三今物價視舊為高除金銀則額所不能盡該自餘金

銀可竝添一分詔從之七年三月戶部尚書高汝礪言  
舊制小商貿易諸物收錢四分而金銀乃重細之物多  
出富有之家復止三分是為不倫亦乞一例收之省臣  
議以為如此恐多匿隱遂止從舊

欽定四庫全書

金史卷五十

元中書右丞相總裁托克托等修

志第三十一

食貨五

榷場  
水田

和糴  
區田

常平倉  
入粟贖度牒

榷場與敵國互市之所也皆設場官嚴厲禁廣屋宇以通二國之貨歲之所獲亦大有助於經用焉熙宗皇統二年五月許宋人之請遂各置於兩界九月命壽州鄧



州鳳翔府等處皆置海陵正隆四年正月罷鳳翔府唐  
鄧穎蔡鞏洮等州并膠西縣所置者而專置於泗州尋  
伐宋亦罷之五年八月命榷場起赴南京國初於西北  
招討司之燕子城北羊城之間嘗置之以易北方牧畜  
世宗大定三年市馬於夏國之榷場四年以尚書省奏  
復置泗壽蔡唐鄧穎密鳳翔秦鞏洮諸場七年禁秦州  
場不得賣米麵及羊豕之脂并可作軍器之物入外界  
十七年二月上謂宰臣曰宋人喜生事背盟或與達寔

交通恐枉害生靈不可不備其陝西沿邊榷場可止留  
一處餘悉罷之令所司嚴察姦細前此以防奸細罷西  
界蘭州保安綏德三榷場二十一年正月夏國王李仁  
孝上表乞復置以保安蘭州無所產而且稅少惟於綏德  
為要地可復設互市命省臣議之宰臣以陝西隣西  
夏邊民私越境盜竊緣有榷場故姦人得往來擬東勝  
可依舊設陝西者竝罷之上曰東勝與陝西道路隔絕  
貿易不通其令環州置一場尋於綏德州復置一場十

二月禁壽州榷場受分例分例者商人贄見場官之錢幣也章宗明昌二年七月尚書省以泗州榷場自前關防不嚴遂奏定從大定五年制官為增修舍屋倍設關禁委場官及提控所拘榷以提刑司舉察惟東勝靜慶州來遠軍者仍舊餘皆脩完之泗州場大定間歲獲五萬三千四百六十七貫永安元年增為十萬七千八百九十三貫六百五十三文所須雜物泗州場歲供進新茶千勝荔支五百斤圓眼五百斤金橘六千斤橄欖五

百斤芭蕉乾三百箇蘓木千斤溫柑七千箇橘子八十  
箇沙糖三百斤生薑六百斤梔子九十稱犀象丹砂之  
類不與焉宋亦歲得課四萬三千貫秦州西子城場大  
定間歲三萬三千六百五十六貫承安元年歲獲十二  
萬二千九十九貫承安二年復置於保安蘭州三年九  
月行樞密院奏薩察等告開權場擬於色勒年安置許  
自今年十二月貿易尋定制隨路權場若擅以見錢入  
外界與外人交易者徒五年三斤以上死宋界諸場以

伐宋皆罷泰和八年八月以與宋和宋人請如舊置之  
遂復置於唐鄧壽泗息州及秦鳳之地宣宗貞祐元年  
秦州榷場為宋人所焚二年陝西安撫副使烏庫哩揚  
珠復開設之歲所獲以十數萬計三年七月議欲聽榷場  
互市用銀而計數稅之上曰如此是公使銀入外界  
也平章盡忠權叅知政事德升曰賞賜之用莫如銀絹  
而府庫不足以給之互市雖有禁而私易者自如若稅  
之則歛不及民而用可足平章高琪曰小人敢犯法不

行爾況許之乎今軍未息而產銀之地皆在外界不禁則公私指日罄矣上曰當熟計之興定元年集賢諮議官呂鑑言嘗監息州榷場每場獲布數千匹銀數百兩兵興之後皆失之金銀之稅世宗大定五年聽人射買寶山縣銀冶九年御史臺奏河南府以和買金銀抑配百姓且下其直上曰初朕欲泉貨流通故令行豈可反害民乎遂罷之十二年詔金銀坑冶恣民採毋收稅二十七年尚書省奏聽民於農隙採銀承納官課明昌二

年天下見在金千二百餘錠銀五十五萬二千餘錠三年以提刑司言封諸處銀冶禁民採煉五年以御史臺奏請令民採煉隨處金銀銅冶上命尚書省議之宰臣議謂國家承平日久戶口增息雖嘗禁之而貧人苟求生計聚衆私煉上有禁之之名而無杜絕之寔故官無利而民多犯法如今民射買則貧民壯者為夫匠老稚供雜役各得均齊而射買之家亦有餘利如此則可以久行此之官役顧工糜費百端者有間矣遂定制有治

之地委穆昆縣令籍數召募射買禁權要官吏弓兵里胥皆不得與如舊場之例令州府長官一員提控提刑司訪察而禁治之上曰此終非長策叅知政事胥持國曰今姑聽如此後有利然後設官可也譬之酒酤蓋先為坊場而後官榷也上亦以為然遂從之墳山西銀山之銀窟凡百一十有三

和糴熙宗皇統二年十月燕西東京河東河北山東汴京等路秋熟有命司增價和糴世宗大定二年以正隆



之後倉廩久匱遣太子少師完顏守道等山東東西路收糴軍糧除戶口歲食外盡令納官給其直三年謂宰臣曰國家經費甚大向令山東和糴止得四十五萬餘石未足為備自古有水旱所以無患者由蓄積多也山東軍屯處湏急為二年之儲若遇水旱則用振濟自餘宿兵之郡亦湏糴以足之京師之用甚大所需之儲其勅戶部宜急為計五年青宰臣曰朕謂積貯為國本當脩倉廩以廣和糴今聞外路官文具而已卿等不留心

甚不稱委任之意六年八月勅有司秋成之後可於諸路廣糴以備水旱九年正月諭宰臣曰朕觀宋人虛誕恐不能久遵誓約其令將臣謹飭邊備以戒不虞去歲河南豐宜令所在廣糴以寔倉廩詔州縣和糴毋得抑配百姓十二年十二月詔在都和糴以寔倉廩且使錢幣流通又詔凡秋熟之郡廣糴以備水旱十六年九月諭左丞相赫舍哩良弼曰西邊自來不備儲蓄其令所和在和糴以備緩急十七年春尚書省奏先奉詔振濟東

京等路飢民三路粟數不能給上曰朕嘗諭卿等豐年廣糴以備凶歉卿等皆言天下倉廩盈溢今欲振濟乃云不給自古帝王皆以蓄積為國長計朕之積蓄豈欲獨用即今不給可於隣道取之自今多備當以為常四月尚書省奏東京三路十二明安尤闕食者已振之矣尚未有振者詔遣官詣復州哈斯罕路檢視富家蓄積有餘增直以糴令近地居民就往受糴十八年四月命泰州所管諸明安西北路招討司所管奚明安咸平府

慶雲縣霽鬆河等等遇豐年多和糴章宗明昌四年七月諭旨戶部官聞通州米粟甚賤若以平價官糴之何如於是有司奏中都路去歲不熟今其價稍減者以商旅運販繼至故也若即差官爭糴竊恐市價騰踴貧民愈病請俟秋收日依常平倉條理收糴詔從之明昌五年五月上曰聞米價騰踴今官運至者有餘可減直以糴之其明告民不須貴價私糴也六年七月勅宰臣曰詔制內織饅之地令減價糴之而貧民無錢者何以得

食其議振濟省臣以為闕食州縣一年則當振貸二年  
然後振濟如其民寔無恒產者雖應振貸亦請振濟上  
遂命間隔饑荒之地可以辦錢收糴者減價糴之貧乏  
無依者振濟宣宗貞祐三年十月命高汝礪糴於河南  
諸郡令民輸輓入京復命在京諸倉糴民輸之數粟侍  
御史洪果納新言汝礪所糴足給歲夫民既於租賦之  
外轉輓而來亦已勞矣止將其餘以為歸資而又強取  
之可乎且糴此有日矣而止得三百餘石此何濟也詔

罷之十二月附近郡縣多糴於京師穀價騰踴遂禁其  
出境四年河北行省侯摯言河北人相食觀滄等州斗  
米銀十餘兩伏見汳河諸津許販粟北渡然每石官糴  
其八商人無利誰肯為之且河朔之民皆陛下赤子既  
懼兵革又坐視其死臣恐弄兵之徒得以藉手而起也  
願止其糴縱民輸販為便詔從之又制凡軍民客旅粟  
不於官糴處糴而私販渡河者杖百汳河軍及譏察權  
豪家犯者徒年杖數並的決從重以物沒官上以河北

州府錢多其散失民間頗廣命尚書省措畫之省臣奏  
已命山東河北權酤及濱滄鹽司以分数帶納矣今河  
北艱食販粟北渡者衆宜權立法以遮糴之擬於諸渡  
口南岸選通練財貨官先以金銀絲絹等博易商販之  
糧轉之北岸以迴易糴本兼收見錢不惟杜姦弊亦使  
錢入京師從之又上封事者言比年以來屢艱食雖由  
調度徵歛之繁亦兼并之家有以奪之也收則乘賤多  
糴困急則以貸人私立券質名為無利而寔數倍饑民

惟恐不得莫敢較者故場功甫畢官租未了而國已空  
矣此富者益富而貧者益貧者也國朝立法舉財物者  
月利不過三分積久至倍則止今或不期月而息三倍  
願明勅有司舉行舊法豐熟之日增價和糴則在公有  
益而私無損矣詔宰臣行之是年權河東南路宣撫副  
使烏庫哩慶壽言邀糴事見鹽志下興定元年上頗聞百姓  
以和糴太重棄業者多命宰臣加意焉八月以戶部郎  
中楊貞權陝西行六部尚書收給潼陝軍馬之用奏糴



販糧濟河者之半以寬民從之六月立和糴賞格

常平倉世宗大定十四年嘗定制詔中外行之其法尋廢章定明昌元年八月御史請復設勅省臣詳議以聞省臣言大定舊制豐年則增市價十之二以糴儉歲則減市價十之一以出平歲則已夫所以豐則增價以收者恐物賤傷農儉則減價以出者恐物貴傷民增之損之以平粟價故謂常平非謂使天下之民專仰給於此也今天下生齒至衆如欲計口使餘一年之儲則不惟

數多難辨又慮出不以時而致腐敗也況復有司抑配之弊殊非經久之計如計諸郡縣驗戶口例以月支三斗為率每口但儲三月已及千萬數亦足以平物價救荒凶矣若令諸處自官兵三年食外可充三月之食者免糴其不及者俟豐年糴之庶可久行也然立法之始貴在必行其令提刑司各路計司兼領之郡縣吏沮格者糾能推行者加擢用若中都路年穀不熟之所則依常平法減其價三之一以糴詔從之三年八月勅常平

倉豐糴儉糴有司奉行勤惰褒罰之制其徧諭諸路其奉行減裂者提刑司糾察以聞又謂宰臣曰隨處常平倉往往有名無寔況遠縣人戶豈肯跋涉直就州縣糴糴可各縣置倉命州縣府官兼提控管勾遂定制縣距州六十里內就州倉六十里外則特置舊擬備戶口三月之糧恐數多致損改令戶二萬以上備三萬石一萬以上備二萬石一萬以下五千以上備萬五千石五千以下備五千石河南陝西屯軍貯糧之縣不在是數

州縣有倉仍舊否則初置郡縣吏受代所糴粟無壞  
月內交割給由如無同管勾亦准上交割違限委州府以  
提刑司差官催督監交本處歲豐而收糴不及一分者  
等內降提刑司體察直申尚書省至日斟酌黜陟九月  
置常平倉之地令州府官提舉之縣官兼董其事以所  
多寡約量升降為永制又諭尚書省曰上京路諸縣未  
有常平倉如亦可置定亦當備粟數以聞四年十月尚書省  
奏今上京扶餘率賓海蘭呼爾哈等路明安穆昆民戶計

一十七萬六千有餘每歲收稅粟二十萬五千餘石所去者六萬六千餘石總其見數二百四十七萬六千餘石臣等以為此地收多支少遇災足以振濟似不必置遂止五年九月尚書省奏明昌三年始設常平倉定其永制天下常平倉總五百一十九處見積粟三千七百八十六萬三千餘石可備官兵五年之食米八百一十餘萬石可備四年之用而見在錢總三千三百四十三萬貫有奇僅支二年以上見錢既少且比年稍豐而米價猶貴若復預糴恐價騰踊於民未

便遂詔權罷中外常平倉和糴俟官錢羨餘日舉行  
水田明昌五年閏十月言事者謂郡縣有河者可開渠  
引以溉田詔下州郡既而八路提刑司雖有河者皆言  
不可溉惟中都路言安肅定興二縣可引河溉田四千  
餘畝詔命行之六年十月定制縣官任內有能興水利  
田及百頃以上者陞本等首注除穆昆所管屯田能畝  
增三十頃以上賞銀絹二十兩匹其租稅止從陸田承  
安二年勅放白蓮潭東腴水與百姓溉田三年又命勿

毀高梁河閘從民灌溉泰和八年七月詔諸路按察司  
規畫水田部官謂水田之利甚大沿河通作渠如平陽  
掘井種田俱可灌溉比年邳沂近河布種荳麥無水則  
鑿井灌之計六百餘頃比之陸田所收數倍以此較之  
它境無不可行者遂令轉運司因出計點就令審察若  
諸路按察司因勸農可按問開河或掘井如何為便規  
畫具申以俟興作貞祐四年八月言事者程淵言碭山  
諸縣陂湖水至則畦為稻田水退種麥所收倍於陸地

宜募人佃之官取三之一歲可得十萬石詔從之興定  
五年五月南陽令李國瑞創開水田四百餘頃詔陞職  
二等仍錄其最狀徧諭諸道十一月議興水田省奏漢  
召信臣於南陽灌溉三萬頃魏賈逵堰汝水為新陂通  
運二百餘里人謂之賈侯渠鄧艾修淮陽百尺二渠通淮  
潁大治諸陂於潁之南穿渠三百餘里溉田二萬頃  
今河南郟縣多古所開水田之地收穫於陸地數倍  
勅令分治戶部按行州郡有可開者誘民赴功其租止



依陸田不復添徵仍以官賞激之陝西除三自渠設官外亦宜視例施行元光元年正月遣戶部郎中楊大有等詣京東西南三路開水田

區田之法見嵇康養生論自是歷代未有天下通用如趙過一畝三畦之法者章宗明昌三年三月宰執嘗論其法於上前上曰卿等所言甚嘉但恐農不達此法如其可行當遍諭之四年夏四月上與宰執復言其法久之參知政事胥持國曰今日方之大定間戶口既多

費用亦厚若區種之法行良多利益上曰此法自古有之若其可行則何為不行也持國曰所以不行者蓋民未見其利今已令試種於城南之地乃委官往監督之若民見收成之利當不率而自效矣參知政事瓜爾佳衡以為若有其利古已行矣且用功多而所種少復恐廢瓏畝之田功也上曰姑試行之六月上問參知政事胥持國曰區種事如何對曰六七月之交方可見矣又問河東及代州田種今歲佳否曰比常年頗登是日命

近侍二人馳驛巡視京畿禾稼五年正月勅諭農民使區種先是陳言人武陵高翊上區種法且請驗人丁地土多少定數令種上令尚書省議既定遂勅令農田百畝以上如瀕河易得水之地須區種三十餘畝多種者聽無水之地則從民便仍委各千戶穆昆縣官依法勸率承安元年四月初行區種法男年十五以上六十以下有土田者丁種一畝丁多者五畝止二年二月九路提刑馬百祿奏聖訓農民有地一頃者區種一畝五畝

即止臣以為地肥瘠不同乞不限畝數制可泰和四年九月尚書省奏近奉旨講議區田臣等謂此法本欲利民或以天旱乃始用之倉率施功未必有益也且五方地肥瘠不同使皆可以區種農民見有利自當勉以效之不然督責雖嚴亦徒勞耳勅遂令所在長官及按察司隨宜勸諭亦竟不能行

入粟鬻度牒熙宗皇統三年三月陝西旱饑詔許富民入粟補官世宗大定元年以兵興歲歉下令聽民進納

補官又募能濟饑民者視其人數為補官格五年上謂  
宰臣曰頃以邊事未定財用闕乏自東南兩京外命  
民進納補官及賣僧道尼女冠度牒紫褐衣師號寺觀  
名額今邊鄙已寧其悉罷之慶壽寺天長觀歲給度牒  
每道折錢二十萬以賜之明昌二年勅山東河北闕食之  
地納粟補官有差承安二年賣度牒師號寺觀額復令  
人入粟補官三年西京饑詔賣度牒以濟之宣宗貞祐  
二年從知大興府事胥鼎所請定權宜鬻恩例格進官

升職丁憂人許應舉求仕監戶從良之類入粟草各有  
數三年制無問官民有能勸率諸人納物入官者米百  
五十石遷官一階正班任使七百石兩階除諸司千石  
三階除丞簿過此數則請於朝廷議賞推司縣官有能  
勸二十石遷一階三千石兩階以濟軍儲又定制司縣  
官能勸率進糧至五千石以上者減一資考萬石以上  
遷一官減二等考二萬石以上遷一官陞一等皆注見  
闕四年河東行省胥鼎言河東兵多民少倉空歲飢竊

見潞州元帥府雖設鬻爵恩例然條目至少未嘗勸率之術今擬凡補貢正班依格止廕一名若願輸許增廕一名僧道已具師號者許補買本司官職官願納粟或不願給俸及券糧者宜量數遷加三舉終場人年五十以上四舉年四十五以上並許入粟該恩大小官及承應人令譯史吏員雖未係班亦許進納遷官其有品官應注諸司者聽獻物借注丞簿丞簿注縣令差使免一差掌軍官能自備芻糧者依職官例遷官如舊四年糧

州僧廣惠言軍儲不足凡京府節鎮以上僧道官乞令納粟百石防刺郡副綱威儀等七十石者乃充三十月滿替諸監寺十石周年一代願復買者聽詔從之興定元年潞州行元帥府事鈕祜祿貞言近承格奏去歲單恩之官以品從差等聽其入粟委帥府書空名宣勅授之則人無陳訴之勞而官有儲蓄矣比年屢降單恩凡羈縻軍職者多未暇授若止許遷新軍則將隔越矣乞令計前後所該輸粟積遷詔從之



金史卷五十

欽定四庫全書

史部

金史卷五十一  
一至三

內閣中書<sub>臣</sub>李彤覆勘

總校官舉人<sub>目</sub>章維桓

校對官學錄<sub>目</sub>常 循

謄錄監生<sub>目</sub>張彭齡

欽定四庫全書

金史卷五十一

元中書右丞相總裁托克托等修

志第三十二

選舉一

進士諸科 律科

經童科 制舉

武舉 試舉士 院官 司天醫學試科

自三代鄉舉里選之法廢秦漢以來各因一代之宜以  
盡一時之才尚疑於用即已故法度之不一其來遠矣  
在漢之世雖有賢良方正諸科以取士而推擇為吏由

金史卷一百一十五  
五十一  
是以致公卿公卿子弟入備宿衛因被寵遇以位通顯  
魏晉而下互有因革至於唐宋進士盛焉當時士君子  
之進不由是塗則自以為歟此由時君之好尚故人心  
之趣向然也遼起唐季頗用唐進士法取人然仕於其  
國者攷其致身之所自進士纔十之二三耳金承遼後  
凡事欲軼遼世故進士科目兼採唐宋之法而增損之  
其及第出身視前代特重而法亦密焉若夫以策論進  
士取其國人而用女直文字以為程文斯蓋就其所長

以收其用又欲行其國字使人通習而不廢耳終金之  
代科目得人為盛諸宮護衛及省臺部譯史令史通事  
仕進皆列於正班斯則唐宋以來之所無者豈非因時  
制宜而以漢法為依据者乎金治純駁議者於是每有  
別焉宣宗南渡吏習日盛苛刻成風殆亦多故之秋急  
於事功不免爾歟自時厥後仕進之岐既廣僥倖之俗  
益熾軍伍勞效雜置令錄門廕右職迭居朝著科舉取  
士亦復汎濫而金治衰矣原其立經陳紀之初所為升

轉之格考察之方井井然有條而不紊百有餘年才具  
不乏豈非其效乎奉詔作金史志其選舉因得而詳論  
之司天太醫內侍等法厯代所有附著于斯繫爵進納  
金季之弊莫甚焉蓋由財用之不足而然也特載食貨  
志

金設科皆因遼宋制有詞賦經義策試律科經童之制  
海陵天德三年罷策試科世宗大定十一年初設女直  
進士科初但試策後增試論所謂策論進士也明昌初

又設制舉宏詞科以待非常之士故金取士之目有七  
焉其試詞賦經義策論中選者謂之進士律科經義中  
選者曰舉人凡養士之地曰國子監始置于天德三年  
後定制詞賦經義生百人小學生百人以宗室及外戚  
皇后大功以上親諸功臣及三品以上官兄弟子孫年  
十五以上者入學不及十五者入小學大定六年始置  
太學初養士百六十人後定五品以上官兄弟子孫百  
五十人曾得府薦及終場人二百五十人凡四百人府

學亦大定十六年置凡十七處共千人初以嘗與廷試及宗室皇家祖免以上親并得解舉人為之後增州學遂加以五品以上官曾任隨朝六品官之兄弟子孫餘官之兄弟子孫經府薦者同境內舉人試補三之一闕里廟宅子孫年十三以上不限數經府薦及終場免試者不得過二十人凡試補學生太學則禮部主之州府則以提舉學校學官主之曾得府薦及終場舉人皆免試凡經易則用王弼韓康伯註書用孔安國註詩用毛



萇註鄭玄箋春秋左氏傳用杜預註禮記用孔穎達疏  
周禮用鄭玄註賈公彥疏論語用何晏集註邢昺疏孟  
子用趙岐註孫奭疏孝經用唐玄宗註史記用裴駰註  
前漢書用顏師古註後漢書用李賢註三國志用裴松  
之註及唐太宗晉書沈約宋書蕭子顯齊書姚思廉梁  
書陳書魏收後魏書李百藥北齊書令狐德棻周書魏  
徵隋書新舊唐書新舊五代史老子用唐玄宗註疏荀  
子用楊倞註揚子用李軌宋咸柳宗元吳秘註皆自國

子監印之授諸學校凡學生會課三日作策論一道又三日作賦及詩各一篇三月一私試以季月初先試賦間一日試策論中選者以上五名申部遇旬休節辰皆有假病則給假省親遠行則給程犯學規者罰不率教者黜遭喪百日後求入學者不得與釋奠禮凡國子學生三年不能充貢欲就諸局承應者學官試能粗通大小各一經者聽章宗大定二十九年上封事者乞興學校推行三舍法及鄉以八行貢春官以設制舉宏詞事

下尚書省集百官議戶部尚書鄧儼等謂三舍之法起於宋熙寧間王安石罷詩賦專尚經術太學生初補外舍無定員由外陞內舍限二百人由內陞上舍限百人各治一經每月考試或特免解或保舉補官其法雖行而多席勢力尚趨走之弊故蘇軾有三舍既興貨賂公行之語是以元祐間罷之後雖復而宣和三年竟廢臣等謂立法貴乎可久彼三舍之法委之學官選試啟僥倖之門不可為法唐文皇養士至八千人亡宋兩學五

千人今策論詞賦經義三科取士而太學所養止百六十人外京府或至十人天下今及千人今若每州設學專除教授月加考試每舉所取數多者賞其學官月試定為三等籍之一歲中頓在上等者優復之不率教行惡者黜之庶幾得入之道也又成周鄉舉里選法卒不可復設科取士各隨其時八行者乃亡宋取周禮之六行孝友睦婣任恤加之中為八也凡人之行莫大於孝廉今已有舉孝廉之法及民有才能德行者令縣官

薦之今制犯十惡姦盜者不得應試亦六德六行之遺  
意也夫制舉宏詞蓋天子待非常之士若設此科不限  
進士并選人試之中選擢之臺閣則人自勉矣上從其  
議遂計州府戶口增養士之數於大定舊制京府十七  
處十人之外置節鎮防禦刺史州學六十處增養千人  
各設教授一員選五舉終場或進士年五十以上者為  
之府學二十有四學生九百五人

大興開封平陽真定  
東平府各六十人太

原益都府各五十人大定河間濟南大名京兆府各四  
十人遼陽彰德府各三十人河中慶陽臨洮河南府各

二十五人鳳翔平涼延安咸  
平廣寧興中府各二十人  
節鎮學三十九共六百一

十五人

絳定衛懷滄州各三十人  
各二十五人代同鄆州各二十人  
萊密洛河冀邢克州  
奉聖州十五

人餘二十三

防禦州學二十一共二百三十五人

博德  
洛棟

節鎮皆十人

毫各十五人餘

十六州各十人  
凡千八百人女直學自大定四年以女

直大小字譯尚書頒行之後擇明安穆昆內良家子弟

為學生諸路至三千人九年取其尤俊秀者百人至京

師以編修溫特赫提克德教之十三年以策詩取士始

設女直國子學諸路設女直府學以新進士為教授國

子學策論生百人小學生百人府州學二十二中都上  
京呼爾哈率賓海蘭扶餘博索咸平泰州臨潢北京冀  
州開州豐州西京東京蓋州隆州東平益都河南陝西  
置之凡取國子學生府學生之制皆與詞賦經義生同  
又定制每穆昆取二人若宗室每二十戶內無願學者  
則取有物力家子弟年十三以上二十以下者充凡會  
課三日作策論一道季月私試如漢生制大定二十九  
年勅凡京府鎮州諸學各以女直漢人進士長貳官提

控其事具入官銜

河南陝西女直學承安二年罷之餘如舊

凡諸進士舉人由鄉至府由府至省及殿廷凡四試皆  
中選則官之至廷試五被黜則賜之第謂之恩例又有  
特命及第者謂之特恩恩例者但考文之高下為第而  
不復黜落凡詞賦進士試賦詩策論各一道經義進士  
試所治一經義論策各一道其設也始於太宗天會元  
年十一月時以急欲得漢士以撫輯新附初無定數亦  
無定期故二年二月八月凡再行焉五年以河北河東



初降職員多闕以遼宋之制不同詔南北各因其素所  
習之業取士號為南北選熙宗天眷元年五月詔南北  
選各以經義詞賦兩科取士海陵庶人天德二年始增  
殿試之制而更定試期三年併南北選為一罷經義策  
試兩科專以詞賦取士貞元元年定貢舉程試條理格  
法正隆元年命以五經三史正文內出題始定為三年  
一闈大定四年勅宰臣進士文優則取勿限人數十八  
年謂宰臣文士有偶中魁選不問操履而輒授翰苑之

職如趙承元朕聞其無士行果敗露自今榜首先訪察其鄉行可取則授以應奉否則從常調十九年謂宰臣曰自來御試賦題皆士人嘗擬作者前朕自選一題出人所不料故中選者多名士而庸才不及焉是知題難則名儒亦擅場題易則庸流易僥倖也平章政事唐古安禮奏曰臣前日言士人不以策論為意者正為此爾宜各場通考選文理俱優者上曰并答時務策觀其議論材自可見卿等其議之二十年謂宰臣曰朕嘗諭進

士不當限數則對以所取之外無合格文故中選者少  
豈非題難致然耶若果多合格而有司妄黜之甚非理  
也又曰古者鄉舉有行者授以官今其考滿察鄉曲實  
行出倫者擢之又曰舊不選策今兼選矣然自今府會  
兩試不須試策已中策後則試以制策試學士院官二  
十二年謂宰臣曰漢進士魁例授應奉若行不副名不  
習制誥之文者即與外除二十三年謂宰臣曰漢進士  
皇統間人材殆不復見今應奉以授狀元蓋循資爾制

誥文字各以職事鋪敘皆有定式故易至撰敕詔則鮮有能者參知政事鈕祜祿額特埒曰舊人已登第尚為學不輟今人一及第輒廢而不學故爾上於聽政之隙召參知政事張汝霖翰林直學士李晏讀新進士所對策至縣令闕員取之何道上曰朕夙夜思此未知所出晏對曰臣竊念久矣國朝設科始分南北兩選北選詞賦進士擢第一百五十人經義五十人南選百五十人計三百五十人嗣場北選詞賦進士七十人經義三十

人南選百五十人計二百五十人以入仕者多故員不  
闕其後南北通選止設詞賦科不過取六七十人以入  
仕者少故縣令員闕也上曰自今文理可採者取之毋  
限以數二十八年復經義科章宗明昌元年正月言事  
者謂舉人四試而鄉試似為虛設固當罷去其府會試  
乞十人取一人可以羣經出題而註示本傳上是其言  
詔免鄉試府試以五人取一人仍令有司議外路添考  
試院及羣經出題之制有司言會試所取之數舊止五

百人比以世宗勅中格者取乞依此制行之府試舊六處中有地遠者命特添三處上京咸平府路則試於遼陽河東南北路則試於平陽山東東路則試於益都以六經十七史孝經論語孟子及荀揚老子內出題皆命於題下註其本傳又諭有司曰舉人程文所用故事恐考試官或遽不能憶誤失人材可自注出處注字之誤不在塗注乙之數明昌二年勅官或職至五品者直赴御試平章政事守貞言國家官人之路惟女直漢人進

士得人居多諸司局承應舊無出身自大定後始敎使  
至今鮮有可用者近來放進士第數稍多此舉更宜增  
取若會試止以五百人為限則延試雖欲多取不可得  
也上乃詔有司會試毋限人數文合格則取六年言事  
者謂學者率恃有司全注本傳以示之故不勉讀書乞  
減子史注本傳之制又經義中選之文多膚淺乞擇學  
官及本科人充試官省臣謂若不與本傳恐碩學者有  
偶忘之失可令但知題意而已遂命擇前經義進士為

衆所推者才識優長者為學官過差考試官之際則驗  
所治經參用詞賦進士題注本傳不得過五十字經義  
進士御試第二場試論日添試策一道承安四年上諭  
宰臣曰一場放二狀元非是後場廷試今詞賦經義通  
試時務策止選一狀元餘雖有明經法律等科止同諸  
科而已至宋王安石為相作新經始以經義取人且詞  
賦經義人素所習之本業策論則兼習者也今捨本取  
兼習恐不副陛下公選之意遂定御試同日各試本業



詞賦依舊分立甲次第一名為狀元經義魁次之恩例  
與詞賦第二人同餘分為兩甲中下人竝在詞賦之下  
五年詔考試詞賦官各作程文一道示為舉人之式試  
後赴省藏之時宰臣奏自大定二十五年以前詞賦進  
士不過五百人二十八年以不限人數取至五百八十  
六人先承聖訓合格則取故承安二年取九百二十五  
人兼今有四舉終場恩例若會試取人數過多則涉泛  
濫遂定策論詞賦經義人數雖多不過六百人少則聽

其闕時太常丞郭人傑轉對言詞賦舉人不得作別名  
魚試經義及入學生精加試選無至濫補上勅宰臣曰  
近已奏定後場詞賦經義同日試之若府會試更不令  
魚試恐試經義者少是虛設此科也別名之弊則當禁  
之補試入學生員已有舊條恐行之減裂爾宜嚴防閑  
張行簡轉對言擬作程文本欲為考試之式今會試考  
試官御試讀卷官皆居顯職擢第後離筆硯久不復常  
習今臨試擬作之文稍有不工徒起謗議詔罷之泰和

初平章政事圖克坦鎡病時文之弊言諸生不窮經由  
唯事末學以致志行浮薄可令進士試策日自時務  
外更以疑難經旨相參為問使發聖賢之微旨古今  
事變詔為永制先嘗勅樂人不得舉進士而奴免為  
者則許之尚書省奏舊稱工樂謂配隸之色及倡優  
家今少府監工匠太常大樂署樂工皆民也而不得  
試前代令諸選人身及祖父曾經免為良者雖在官  
得居清貫及臨民今反許試誠玷清論詔遂定制放

人不得應諸科舉其子孫則許之上又謂德行才能非  
進士科所能盡可通行保舉之制省臣奏在周禮大司  
徒以鄉三物教萬民而賓興之所謂萬民農工商賈比  
是也前代立賢無方如版築之士鼓刀之叟垂光簡筌  
者不可勝舉今草澤隱逸才行兼備者令穆昆及司縣  
舉按察司具聞以旌用之既有已降令文矣上命復官  
旨以申之宣宗貞祐二年御史臺言明年省試以中都  
遼東西北京等路道阻宜於中都南京兩處試之三年

諭宰臣曰國初設科素號嚴密今聞會試至於雜坐誼  
譁何以防弊命治考官及監察罪興定二年御史中丞  
巴古喇言國家數路收人惟進士之選最為崇重不求  
備數惟務得賢今場會試策論進士不及二人取一人  
詞賦經義二人取一前雖有聖訓當依大定之制中選  
即收無問多寡然大定間赴試者或至三千取不過五  
百泰和中策論進士三人取一詞賦經義四人取一向  
者貞祐初詔免府試赴會試者幾九千人而取八百有

奇則是十之一而已時已有依大定之制亦何嘗二人取一哉今考官泛濫如此非所以為求賢也宜於會試之前奏請所取之數使恩出于上可也詔集文資官議卒從泰和之例又謂宰臣曰從來廷試進士日晡後即遣出宮恐文思遲者不得盡其才令待至暮時特賜經義進士王彪等十三人及第上覽其程文愛其辭藻咨歎久之因怪學者益少謂監試官左丞高汝礪曰養士學糧歲稍豐熟即以本色給之不然此科且廢矣五年

省試經義進士考官於常格外多取十餘人上命以特恩賜第又命河北舉人今府試中選而為兵所阻者免後舉府試

策論進士選女直人之科也始大定四年世宗命頒行女直大小字所譯經書每穆昆選二人習之尋欲興女直字學校明安穆昆內多擇良家子為生諸路至三千人九年選異等者得百人薦於京師廩給之命溫特赫提克德教以古書作詩策後試得圖克坦鑑以下三十

餘人十一年議行策選之制至十三年始定每場策一道以五百字以上成免鄉試府試止赴會試御試且詔京師設女直國子學諸路設女直府學擬以新進士充教授以教士民子弟之願學者俟行之久學者衆則同漢進士三年一試之制就憫忠寺試圖克坦鎰等其策曰賢生於世世資於賢世未嘗不生賢賢未嘗不輔世蓋世非無賢惟用與否若伊尹之佐成湯傳說之輔高宗呂望之遇文王皆起耕築漁釣之間而其功業卓然



後世不能企及者蓋殷周之君能用其人盡其才也本朝以神武定天下聖上以文德綏海內文武並用言小善而必從事小便而不棄蓋取人之道盡矣而尚憂賢能遺於草澤者今欲盡得天下之賢而用之又俾賢者各盡其能以何道而臻此乎憫忠寺舊有雙塔進士入院之夜半聞東塔上有聲如音樂西入宮考試官侍御史完顏佛寧等曰文路始開而有此得賢之祥也中選者得圖克坦鎡以下二十七人十六年命皇家兩從以

上親及宰相子直赴御試皇家袒免以上親及執政官之子直赴會試二十年以圖克坦鎰等教授中外學大振遂定制今後以策詩試三場策用女直大字詩用小字程試之期皆依漢進士例省臣奏漢人進士來年三月二十日鄉試八月二十日府試次年正月二十日會試三月十二日御試勅以來年八月二十五日於中都上京咸平東平府等路四處府試餘從前例上曰契丹大字年遠觀其所撰詩義理深微當時何不立契丹進

士科舉今雖立女直字科慮女直字創製日近義理未  
如漢字深奧恐為後人議論丞相守道曰漢文字恐初  
亦未必能如此由歷代聖賢漸加修舉也聖主天姿明  
哲令譯經教天下行之久亦可同漢人文章矣上曰其  
同漢人進士例譯作程文俾漢官覽之二十二年三月  
策試女直進士至四月癸丑上謂宰臣曰女直進士試  
已久矣何尚未考定叅知政事額特埒對曰以其譯付  
看故也上命速之二十三年上曰女直進士設科未久

若令積習精通則能否自見矣二十八年諭宰臣曰女  
直進士惟試以策行之既久人能預備今若試以經義  
可乎宰臣對曰五經中書易春秋已譯之矣俟譯詩禮  
畢試之可也上曰大經義理深奧不加歲月不能貫通  
今宜於經內姑試以論題後當徐試經義也章宗大定  
二十九年詔許諸人試策論進士舉七月省奏如詩策  
論俱作一日程試恐力有不逮詩策作一日論作一日  
以詩策合格為中選而以論定其名次上曰論乃新添

至第三舉時當通定去留明昌元年明安穆昆願試進士者擬依餘人例不可令直赴御試上曰是止許女直進士毋令試漢進士也又定制餘官第五品散階令直赴會試官職俱至五品令直赴御試承安二年勅策論進士限丁習學遂定制內外官員諸局分承應人武衛軍若明安穆昆女直及諸色人戶止一丁者不許應試兩丁者許一人四丁二人六丁以上止許三人三次終場不在驗丁之限三年定制女直人以年四十五以下

試進士舉於府試十日前委佐貳官善射者試射其制以六十步立垛去射者十五步對立兩竿相去二十步去地二丈以繩橫約之弓不限強弱不計中否以張弓巧便發箭迅正者為熟閑射十箭中兩箭出繩下至垛者為中選餘路委提刑司在都委監察體究如當赴會試御試者大興府佐貳官試驗三舉終場者免之四年禮部尚書賈銘言策論進士程試弓箭其兩舉終場及年十六以下未成丁者若以弓箭退落有失賢路乞於

及第後試之中者別加任使或升遷否者降之省臣謂  
舊制三舉終場免試今兩舉亦免之未可若以未成丁  
免試必有妄匿年者如果幼使徐習未晚也至於及第  
後試驗升降則已有定格矣詔從舊制在泰和格復有  
以時務策參以故事及疑難經旨為問之制宣宗南遷  
興定元年制中都西京等路策論進士及武舉人權於  
南京東平博索上京四處府試五年上賜進士沃呼業  
德等二十八人及第上覽程文恠其數少以問宰臣對

曰大定制隨處設學諸穆昆貢三人或二人為生員贍以錢米至泰和中人例授地六十畝所給既優故學者多今京師雖存府學而月給通寶五十貫而已若於諸路總管府及有軍戶處置學養之庶可加益京師府學已設六十人乞更增四十人中京亳州京兆府並置學官於總府以穆昆內不隸軍籍者為學生人畀地四十畝漢學生在京者亦乞同此餘州府仍舊制上從之凡會試之數大定二十五年詞賦進士不得過五百人



二十八年以不限人數遂至五百八十六人章宗令合格則取故承安二年至九百二十五人時以復加四舉終場者數太濫遂命取不得過六百人泰和二年命定會試諸科取人之數司空裏言試詞賦經義者多可五取一策論絕少可四取一恩榜本以優老於場屋者四舉受恩則太優限以年則礙異材可五舉則受恩平章圖克坦鎰等言大定二十五年至明昌初率三四人取一平章張汝霖亦言五人取一府試百人中纔得五耳

遂定制策論三人取一詞賦經義五人取一五舉終場  
年四十五以上四舉終場年五十以上者受恩

凡考試官大定間府試六處各差詞賦試官三員策論  
試官二員明昌初增為九處路各差九員大興府則十  
一員承安四年又增太原為十處有司請省之遂定策  
論進士女直經童千人以上差四員五百人以上三員  
不及五百二員各以職官高者一人為考試官餘為同  
考試官詞賦進士與律科舉人共及三千以上五員二

千四員不及二千三員經義進士及經童舉人千人四員五百以上三員百人以上二員不及百人以詞賦考官兼之後又定制策論試官上京咸平東平各三員北京西京益都各二員律科監試官一員試律官二員隸詞賦試院經童試官一員隸經義考試院與會試同其彌封并謄錄官檢搜懷挾官自餘修治試院監押門官並如會試之制大定二十年上以往歲多以遠地官考試不便遂命差近者

金史四庫全書  
凡會試知貢舉官同知貢舉官詞賦則舊十員承安五年為七員經義則六員承安五年省為四員詮讀官二員泰和三年上以彌封官課語於舉人勅自今女直司則用右選漢人封漢人司則以女直司封宣宗貞祐三年以會試賦題已曾出而有犯格中選者復以考官多取所親上怒其不公命究治之

凡御試讀卷官策論詞賦進士各七員經義五員餘職事各官二員制舉宏詞共三員泰和七年禮部尚書張

行簡言舊例讀卷官不避親至有親人或有不敢定其去留或力加營護而為同列所疑若讀卷官不用與進士有親者則讀卷之際得平心商推上遂命臨期多擬其有親者汰之

凡府試策論進士大定二十年定以中京上京咸平東平四處至明昌元年添北京西京益都為七處兼試女直經童凡上京海蘭率賓呼爾哈扶餘東北招討司等路者則赴會寧府試咸平隆州博索東京蓋州懿州者

則赴咸平府試中都河北東西路者則赴大興府試西  
京并西南西北二招討司者則赴大同府試北京臨潢  
宗州興州全州者則赴大定府試山東西大名南京者  
則赴東平府試山東東路則試於益都凡詞賦經義進  
士及律科經童府試之處大定間大興大定大同開封  
東平京兆凡六處明昌初增遼陽平陽益都為九處承  
安四年復增太原為十中都河北則試於大興府上京  
東京咸平府等路則試於遼陽府餘各試於其境

凡鄉試之期以三月二十日府試之期若策論進士則以八月二十日試策間三日試詩詞賦進士則以二十五日試賦及詩又間三日試策論經義進士又間詞賦後三日試經義又三日試策次律科次經童每場皆間三日試之會試則策論進士以正月二十日試策皆以次間三日同前御試則以三月二十日策論進士試策二十三日試詩論二十五日詞賦進士試賦詩論而經義進士亦以是日試經義二十七日乃試策論若試日

遇雨雪則候晴日御試唱名後試策則稟奏宏詞則作  
二日程試舊制試女直進士在再試漢進士後大定二  
十九年以復設經義科更定是制

凡監檢之制大興府則差武衛軍餘府則於附近明安  
內差摘平陽府則差順德軍凡府會試每四舉人則差  
一人復以官一人彈壓御試策進士則差弩手及隨局  
承應人漢進士則差親軍人各一名皆用不識字者以  
護衛十人親軍百人長五十人長各一人巡護泰和元



年省臣奏搜檢之際雖當嚴切然至於解髮袒衣索及耳鼻則過甚矣豈待士之禮哉故大定二十九年依嘗依前故事使就沐浴官置衣為之更之既可防濫且不虧禮上從其說命行之

恩例明昌元年定制省元直就御試不中者許綴榜末解元但免府試四舉終場依五舉恩例所試文卷惟犯御名廟諱不成文理者則黜之餘並以文之優劣為次仍一日試三題其五舉者止試賦詩女直進士亦同此

例承安五年勅進士四舉該思詞賦經義當以各科為場數不得通數又恩榜人應授官者監試官於試時具數以奏特恩者授之泰和三年以經義會元與策論詞賦進士不同若御試被黜則附榜末為太優若同恩例又與四舉者不同遂定制依曾經府試解元免府試之例會試下第再舉直赴御試

律科進士又稱為諸科其法以律令內出題府試十五題每五人取一人大定二十二年定制會試每場十五

題三場共通三十六條以上文理優擬斷常用字切者  
為中選臨時約取之初無定數其制始見於海陵庶人  
正隆元年至章宗大定二十九年有司言律科止知讀  
律不知教化之源可使通治論語孟子以涵養其氣度  
遂令自今舉後復於論語孟子內試小義一道府會試  
別作一日引試命經義試官出題與本科通考定之

經童之制凡士庶子年十三以下能誦二大經三小經  
又誦論語諸子及五千字以上府試十五題通十三以

上會試每場十五題三場共通四十一以上為中選所  
貴在幼而誦多者若年同則以誦大經多者為最初天  
會八年時太宗以東平童子劉天驥七歲能誦詩書易  
禮春秋左氏傳及論語孟子上命教養之然未有選舉  
之制也熙宗即位之二年詔開貢舉始備其列取至百  
二十二人天德間廢之章宗大定二十九年上謂宰臣  
曰經童豈遽無人其議復置明昌元年益都府中童子  
劉住兒年十一歲能詩賦誦大小六經所書行草頗有

法孝行夙成乞依宋童子李淑賜出身且加以恩詔上  
召至內殿試鳳凰來儀賦魚在藻詩又令賦旱詩上嘉  
之賜本科出身給錢粟官舍令肄業太學明昌三年平  
章政事完顏守貞言經童之科非古也自唐諸道表薦  
或取五人至十人近代宋仁宗以為無補罷之本朝皇  
統間取及五十人因以為常天德時復廢聖主復置取  
以百數恐久積多不勝銓擬乞諭旨約省取之上曰若  
所誦皆及格何如守貞曰視最幼而誦不訛者精選之

則人數亦不至多也復問叅知政事胥持國對曰所誦  
通否易見豈容有濫上曰限以三十或四十人若百人  
皆通亦可復取其精者持國曰是科蓋資教之術耳夫  
幼習其文長玩其義使之蒞政人材出焉如中選者加  
之修習進士舉業則所記皆得為用臣謂可勿令遽登  
仕途必習舉業而後官使之可也若能擢進士第自同  
進士任用如中府薦或會試視其次數優其等級幾舉  
不得薦者從本出身似可以激勸而得人矣詔議行之

制舉有賢良方正能直言極諫博學宏材達於從政等  
科試無常期上意欲行即告天下聽內外文武六品以  
下職官無公私過者從內外五品以上官薦於所屬詔  
試之若草澤士德行為鄉里所服者則從府州薦之凡  
試則先投所業策論三十道於學士院視其詞理優者  
委官以羣經子史內出題一日試論三道如可則庭試  
策一道不拘常務取其無不通貫者優等遷擢之宏詞  
科試詔誥章表露布檄書則皆用四六誠諭頌箴銘序

記則或依古今體或參用四六於每舉賜第後進士及在官六品以下無公私罪者在外官薦之令試策官出題就考通試四題分二等遷擢之二科皆章宗明昌元年所創者也

武舉嘗設於皇統時其制則見於泰和式有上中下三等能挽一石力弓以重七錢竹箭百五十步立貼十箭內府試欲中一箭省試中二箭程試中三箭又遠射二百二十步垛三箭內一箭至者又百五十步內每五十



步設高五寸長八寸卧鹿二能以七斗弓二大鑿頭鐵箭馳射府試則許射四反省試三反程試二反皆能中二箭者又百五十步內每三十步左右錯置高三尺木偶人戴五寸方板者四以槍馳刺府試則許馳三反省試二反程試三反左右各刺落一板者又依廢例問律一條又問孫吳書十條能說五者為上等凡程試若一有不中者皆黜之若射貼弓八斗遠射二百一十步射鹿弓六斗孫吳書十條通四為中等射貼弓七斗遠射

二百五步射鹿弓五斗孫吳書十條通三為下等解律  
刺板皆欲同前凡不知書者雖上等為中中則為下凡  
試中中下願再試者聽舊制就試上等不中不許再試  
中下等泰和元年定制不分舊等但從所願試中則以  
三等為次二年省奏武舉程式當與進士同時今年八  
月府試欲隨路設考試所臨期差官恐以初立未見應  
試人數遂權令各處就考之宣宗貞祐三年同進士例  
賜勅命章服時以隨處武舉入試者自非見居職任及

已用於軍前者令郡縣盡遣詣京師別為一軍以備緩  
急其被薦而未授官者亦量材任之元光二年東京總  
帥赫舍哩約赫德言武舉入仕皆授巡尉軍轄此曹雖  
善騎射不歷行陣不知軍旅一旦臨敵恐致敗事乞盡  
括付軍前為長校俟有功則升之宰臣奏國家設此科  
與進士等而欲盡寘軍中非獎進人材之道遂籍丁憂  
待闋去職者付之

試學士院官大定二十八年勅設科取士為學士院官

禮部下太常按唐典初入學士院例先試今若於進士已仕者以隨朝六品外路五品職事官薦試制詔誥等文字三道取文理優者充應奉由是翰苑之選為精明昌五年以學士院撰文字人少命尚書省訪有文采者勾取權試之

凡司天臺學生女直二十六人漢人五十人聽官民家年十五以上三十以下試補又三年一次選草澤人試補其試之制以宣明厯試推步及婚書地理新書試合

婚安葬并易筮法六壬課三命五星之術凡醫學十科大興府學生三十人餘京府二十人散府節鎮十六人防禦州十人每月試疑難以所對優劣加懲勸三年一次試諸太醫雖不係學生亦聽試補

金史卷五十一